



# ACEB

ARCHIV CULTURAL  
ENGIADINA BASSA

## Rapport annual 2018

### Società

Il numer da commembers dal ACEB s'amunta per la fin dal 2018 a 159 (122 persunas singulas, 25 famiglias o conjugals e 12 persunas giuridicas).

### Suprastanza

In occasiun da la radunanza generala dal 2018 vaiva il capo cumünal da Valsot, Victor Peer, giavüschà cha la suprastanza ponderescha amo üna jada scha nossa società nu vuless aquistar la chasa da scoula a S-chadatsch. La suprastanza vaiva nempe comunicà cha la lezcha da la società ACEB saja tenor statüts la gestiun da l'archiv cultural ma na da cumprar stabilimaints. Sco explichà aint il rapport annual 2017 vaiva la suprastanza eir dumandà al cumün da Scuol, sch'el nu pudess metter a disposiziun localitats per nos archiv. Ils sclerimaints cul cumün da Scuol han però muossà chi nu dà intant ün proget concret per ün nouv archiv cumünal a Scuol ed uschè eir na per localitats per l'ACEB. In seguit eschna its in tschercha dad ün'otra soluziun per sgürar l'existenza da l'ACEB a lunga vista. L'idea cha no vain uossa perseguità es da s-chaffir üna fundaziun chi cumpress il stabilimaint a S-chadatsch. Quista fundaziun vess dad avoir per mera dad aquistar, finanziair e mantegner il sabilimaint e da til metter a disposiziun a la società ACEB per manar l'archiv cultural. Ün tal model s'ha verificà eir in oters lös, per exaimpel pro la Stamparia Strada e pro'l Center cultural Baselia San Niclà. Ils sclerimaints necessaris e la tschercha da persunas prontas da s'ingaschar in üna tala fundaziun sun gnüdas iniziadas.

### Occurrenz

Als 13 november 2018 ha l'ACEB organisà ün referat in chasa da scoula a Guarda. Dr. Ruedi Haller dal Parc Naziunal Svizzer ha referi davart il tema „Was verraten uns alte Fotos und Karten über die Landschaft des Unterengadins?“

### Publicaziuns

Aint il Chalender Ladin dal 2019 sun cumparüdas duos contribuziuns davart l'ACEB. Illa prüma n'haja gnü occasiun da preschantar l'istorgia, las meras e la lavur da l'archiv sco eir las pussibilitats cha no spordschain al public per far adöver da l'archiv. In sia contribuziun „Süls stizis da meis perdavants“ descriva nos anteriur commember da suprastanza Silvio à Porta da Ftan sia fascinaziun per documainta veglia ch'el ha chattà in sia chasa. Cun leger quists documaints es el gnü a savair bler davart seis perdavants ed eir da l'istorgia da temps passats in general. Per cha simla documainta vegna mantgnüda e saja a disposiziun eir a generaziuns futuras racumonda Silvio à Porta da tilla surdar al ACEB, uschè sco quai ch'el ha fat.

## **Lavur dal archiv**

Ils archivars Beat Hofmann, Cristian Juon, Armon Parolini, Clà Rauch, Peder Rauch e Jon Duri Tratschin han praistà dal 2018 in tuot 993 uras da lavur. Documainta es gnüda missa a disposiziun impustüt da persunas privatas, ma eir dad instituziuns. La glista detagliada da las entradas as chatta sülla pagina internet suot [www.archivcultural.ch/documainta/entradas\\_2018](http://www.archivcultural.ch/documainta/entradas_2018)

Tschlin, marz 2019

Jon Duri Tratschin, president ACEB